

**Kommunit Namminersorlutillu Oqartussat
missingersuutaat naatsorsuutaallu pillugit
Inatsisartut inatsisaata allanngortinneqarnissaa
pillugu Inatsisartut inatsisaat
(Teknikikkut naleqqussaait, Kommunit
immikkoortunut pilersaarutaat kiisalu Piffissaq
ungasinnerusoq eqqarsaatigalugu
aningaasaliissuteqarnissamut
Aningaasaateqarfimmut nuutsisarneq)**

§ 1

Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni nr. 26, 28. november 2016-imeersumi, Inatsisartut inatsisaanni nr. 24, 28. november 2018-imi aamma Inatsisartut inatsisaanni nr. 13, 1. December 2021-mi allanngortinneqartumi, tulluuttut allannguutigineqarput:

1. § 2, imm. 3, uniffiit aappaattut ikkunneqassaaq:

” Uniffik siullesq malillugu akuersinermi, taarsigassarsiat § 6 malillugu akuerineqartillugit, aningaasallu aningaasaliinissanut akuerineqartunik aningaasalersuinermit atorneqartillugit aamma taarsigassarsianut, taarsigassarsianik pilersitsinermi akiliutitut aningaasartuutitut, naqitsinermi akiliummut, akiliinermut, akiliutitut ernianullu tunngasunik aningaasartuutit ilaapput.”

2. § 2-mi imm. 8 aamma 9 ikkunneqassapput:

” Imm. 8. Imm. 2, nr. 1-imi taaneqartut missingersuutit inissisimanerannik naatsorsuinermit, tunissutit, tapiissutit, ikiorsiissutit assigisaallu aningaasaateqarfinnit, ingerlatsivinnit, kattuffinnit, suliffeqarfinnit naalagaaffiillu suliniaqatigiiffinit inuinnarnillu tiguneqartut, tunissutit, tapiissutit il.il. kommunip namminersorlutilluunniit oqartussat aalajangersimasunik pisinissamut, aalajangersimasunik sanaartornissamut allanilluunniit suliassanut atugassaattut tiguneqartut isiginiarneqartassanngillat.

Imm. 9. Imm. 2, nr. 2-mi oqaatigineqartut missingersuutit inissisimanerannik naatsorsuinermit aningaasartuutit siunertanut imm. 8-mi taaneqartunut, aningaasartuutit aningaasanik tunissutitut, tapiissutitut il.il. tiguneqartunit annertunerutinnagit ilanngunneqartassanngillat. “

3. § 4-mi imm. 2-p kingorna ilanngunneqarpoq:

" Imm. 3. Inatsisartut inatsisaatigut imaluunniit Inatsisartut inatsisaata allanngortinneratigut, Inatsisartut inatsisaanni imaluunniit Inatsisartut peqqussutaani aningaasartuutini, utertussat kingorna, Inatsisartut kommuninut katillugit 5 mio. kr.-t sinnerlugit aningaasartuuteqarnerulersitsippata, aningaasartuutaanerusussatut ilimagineqartut Namminersorlutik Oqartussat missingersuutaasa inissisimanerininik naatsorsuinermi ilanngullugit naatsorsorneqassapput, tak. imm. 1 aamma 2."

4. § 12, imm. 1, uniffiit aappaat, ima oqaasertalerneqassaaq:

" Oqaasertaliussat nalinginnaasumik taamaallaat aningaasaliinermi aqutsinermut ilapittuutaassapput."

5. § 18, imm. 4, ima oqaasertalerneqassaaq:

" Imm. 4. Iluanaarutit imm. 3, nr. 1-4-ami taaneqartut tiguneqarnerminnit piaarnerpaamik aningaasaateqarfimmut ikineqartassapput. Sinneqartoorutit imm. 3, nr. 5-imi taaneqartut Inatsisartut nunatta karsiata naatsorsuutaanik akuersinerata kingorna ukiup aningaasanik inatsiseqarfiup naanerani ukiut sisamaanni ukiunilu aningaasanut inatsiseqarfiusuni akunnermiliuttuni amigartoorutaasinnaasut ilanngaatineqareernerini piaarnerpaamik aningaasaateqarfimmut nuunneqartassapput."

6. § 20-mi imm. 6 ikkunneqassaaq:

" Imm. 6. Naalakkersuisut kommunit immikkoortunut pilersaarutininik suliaqartarnerannut malittarisassanik, immikkoortuni ataasiakkaani periusissanik sukkulluunniit atuuttunik takutitsisunik malittarisassarsiorsinnaapput."

7. § 43, imm. 1, uniffiit pingajuat ima oqaasertalerneqassaaq:

" Kommunalbestyrelsi ukiumoortumik naatsorsuutininut oqaatigisassat nassiunneqartut akineqarnissaannik, ukiumoortumillu naatsorsuutit akuerineqarnissaannik ukiup naatsorsuusiorfiusup qaangiunnerani ukiumi kingusinnerpaamik ulloq 15. september aalajangiissaaq."

8. § 43-mi imm. 4-atut ikkunneqassaaq:

" Imm. 4. Imm. 1-imi killiliussaq naammassineqarsinnaanngippat Aningaasaqarnermut ataatsimiititaliap siulittaasua, taassumaluunniit sinniisua tamanna pillugu ukiup naatsorsuusiorfiusup kingorna kingusinnerpaamik ulloq 15. august Naalakkersuisunut nalunaaruteqassaaq. Naalakkersuisunut ilaasortaq, Naalakkersuisut siulittaasuata erseqqinnerusumik aalajangiinerata kingorna tassunga akisussaasuusoq, pisut malillugit ukiumoortumik naatsorsuutit akuerineqarnissaannut piffissaliussamik qaammatit marluk angullugit kinguartitsisinnaavoq. Piffissaq kinguartitsiffiusoq qaangerneqarpat, § 47, imm. 1-imi aalajangersakkat atuutissapput."

§ 2

Inatsisartut inatsisaat ulloq 1. januar 2024 atuutilissaaq.

Namminersorlutik Oqartussat, ulloq 20. novembari 2023

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut